



## 水資源

天災地變得人類感覺著自家个渺細。這站洵旱欠水、失電兼熱討死摺加上爆開个新冠肺炎，得大家過著膽掣心驚。《增廣賢文》講「常將有日思無日，莫待無時思有時」，提醒人普通時即愛有相當个準備，毋好臨渴正討掘井，遐即毋會赴啊。這站个新聞，臺中和苗栗開始限水，五日有兩日無。雲林縣暗夜時減壓送水。正經係生活真艱苦。

臺灣係年雨量超過 2,600 外公釐个所在，係世界年雨量个三倍，照理講係雨多个所在，無應該欠水正著啊。毋過，新聞一直播，黏泥這黏泥遐座水庫燥到貼底啊。像日月潭會用脛著潭底，嘛發生一件奇蹟。一個去寮个人，一年前跌落潭底个手機，這睏子嘎得人撿著啊，變做大家注意个事件。一兜行業哀哀嘍，像做頭那毛个、洗車个、泔水池這兜，攏直接影響著，百姓个生活感覺真無利便，討洗一下膻身，嘎來欠水，生活實在真否過。

水資源包括地表水和地下水，係發展經濟和生活內底毋會用欠少个。在世界真多所在，對水个需求早即超過水資源會用負擔个程度，真多所在嘛面臨水資源利用毋會平个問題。人臺灣雖然逐年有一站時間喝講欠水，毋過幹頭即隨添放去。普通時應該愛有儉儉用水毋用討債、循環利用个觀念。抑係用中水系統、設「水撲滿」掬雨水儉起來用、起海水淡化廠這兜。

省水打拚个目標，係愛確保後代人有水用、保護淡水濕地。面對極端氣候，臺灣毋會用頭疾醫頭、腳疾醫腳，愛有國家級个水資源政策，毋會用得水庫積沙、河溪污染、水笕漏水，按水正會罣用。臺灣現時有幾下個水資源危機，紅泥溝、打馬膠路這兜得水無法度食落泥底。加上歸臺灣 50 條大溪有三分之一污染去。水笕漏水漏真多，東部个水無法度調到西部來。

新聞嘛不時播著世界欠水危機，像非洲一兜國家實在苦憐。逐日个用水愛用配給，一火灶一日正幾下桶水定。若糶著一窟井水，即算好額人啊！人和牛、羊嘛共窟个垃圾水。得人脛著實在真毋盼。平平係人，佢人个環境無電摺欠水。返頭脛人生活恁好。人更加愛惜福，普通時即愛有節節用水个觀念，共下保護環境毋好得人污染、破壞。用自然工法做溝，得地下水會用得著補足，保護好家園，留得後代淨俐个水。

作者：李秉璋

### ☆詞彙學習☆

【渺細】mio<sup>ˊ</sup> se<sup>ˊ</sup>：渺小。

【洵旱欠水】koo<sup>ˊ</sup> hon<sup>ˊ</sup> kiam<sup>ˊ</sup> fi<sup>ˊ</sup>：旱災缺水。

【失電】shid<sup>ˊ</sup> teen：停電。

【膽掣心驚】dam<sup>ˊ</sup> cheed<sup>ˊ</sup> sim<sup>ˊ</sup> giang<sup>ˊ</sup>：膽戰心驚。

【掘井】kud<sup>ˊ</sup> ziang<sup>ˊ</sup>：挖井。

【艱苦】gan<sup>ˊ</sup> ku<sup>ˊ</sup>：艱難辛苦。

【貼底】dab<sup>ˊ</sup> de<sup>ˊ</sup>：到底。

【哀哀嘍】oi<sup>ˊ</sup> oi<sup>ˊ</sup> bui<sup>ˊ</sup>：哀哀叫，一片哀鴻遍野。

【做頭那毛个】zoo<sup>ˊ</sup> teu<sup>ˊ</sup> na<sup>ˊ</sup> hm<sup>ˊ</sup> e：美髮業。

【喝講】hod<sup>ˊ</sup> gong<sup>ˊ</sup>：喊叫著。

【幹頭】uad<sup>ˊ</sup> teu<sup>ˊ</sup>：轉頭。

【添放】teem<sup>ˊ</sup> piong：忘記。

【討債】too<sup>ˊ</sup> zai<sup>ˊ</sup>：浪費。

【中水系統】zhung<sup>ˊ</sup> fi<sup>ˊ</sup> he tung<sup>ˊ</sup>：將使用過的水回收淨化再利用。

【水撲滿】fi<sup>ˊ</sup> poo<sup>ˊ</sup> man<sup>ˊ</sup>：下雨時用容器把雨水儲存起來，乾旱時就可以使用。

【水笕】fi<sup>ˊ</sup> gong<sup>ˊ</sup>：水管。

【紅泥】fung<sup>ˊ</sup> ni<sup>ˊ</sup>：水泥。

【打馬膠路】da<sup>ˊ</sup> ma<sup>ˊ</sup> ga<sup>ˊ</sup> lu：柏油馬路。

【糶著】leu<sup>ˊ</sup> choo：挖到。

【節節】zied<sup>ˊ</sup> zied<sup>ˊ</sup>：節約。